

萬有文庫

第二集七百種

王雲五主編

唐詩紀事

(三)

計有功撰

商務印書館發行

唐詩紀事

(三)

計有項撰

國學基本叢書

唐詩紀事卷第二十九

常袞

張衆甫

田登

柳郴

李彥遠

薛昇

元載

張元宗

楊郇伯

高拯

梁鎰

劉長川

姚倫

孫處立

劉復

朱彬

戴叔倫

于鵠

王季文

常袞

晚秋集賢院卽事寄徐薛二侍郎云。穆穆上清居。沈沈中祕書。金鋪深內殿。石甃淨寒渠。花樹臺斜倚。宮煙閣半虛。縹囊鋪錦繡。翠軸卷瓊琚。墨潤冰文繭。香消蠹字魚。翻黃桐葉老。吐白桂花初。舊德雙遊處。聯芳十載餘。北朝榮庾薛。西漢盛嚴徐。侍講親華展。徵詩步綺疏。綴簾金翡翠。賜硯玉蟾蜍。移秩東南遠。離憂歲月除。承明期重入。江海意何如。

袞京兆人。爲中書舍人。文采贍蔚。長於應用。譽重一時。相代宗。用人非文詞者。擯不用。世謂之轡伯。

袞晚秋夕集賢卽事詩。司空曙和云。藹藹鳳凰宮。蘭臺玉署通。夜霜凝樹羽。晚日照和風。官亞三台貴。儒開百氏宗。司言陳禹拜。侍講發堯聰。香卷青蒲內。鉛分綠字中。綴籤從太史。鏘珮揖羣公。池接天泉碧。林交玉果紅。寒龜登故葉。秋蝶戀疎叢。顏謝徵文並。鍾裴直事同。離羣驚海鶴。屬思怨江楓。地遠姑蘇外。山長越絕東。慚當哲匠後。下曲奏難工。獨孤及和云。漢家金馬署。帝座紫微郎。圖籍凌羣玉。歌詩冠柏梁。陰

陰萬年樹。肅肅五經堂。揮翰忘朝食。研精待夕陽。晴空露盤迴。秋月鎖窗涼。遠興生班鬢。高情寄縹囊。威
蕤雙鸞鷟。夙昔並翺翔。汲冢同刊謬。蓬山共補亡。差池摧羽翮。流落限江湖。禁省一分袂。吳一作晏天三雨
霜。石渠遺跡滿。水國暮雲長。早晚朝宣室。歸時道路光。錢起和云。文星垂太虛。辭伯綜羣書。綵筆下鴛掖。
褒衣來石渠。典墳探奧旨。造化覩權輿。述聖魯宣父。通經漢仲舒。窗明宜縹帶。地肅近丹除。清晝刪詩暇。
高秋作賦初。露盤侵漢聳。宮柳度鴉疎。靜對連雲閣。晴聞過闕車。舊僚云出矣。晚歲復何如。海嶠瞻歸路。
江城夢直廬。含毫思兩鳳。望遠寄雙魚。定笑巴歌拙。還參麗曲餘。

張衆甫

詩鶴云。馴狎經時久。襜褕短翮存。不隨淮海變。空媿稻粱恩。獨立秋天淨。單棲夕露繁。欲飛還斂翼。誰敢
望乘軒。

戴叔倫酬衆甫詩云。野人無本意。散木任天材。分向空山老。何言上苑來。迢遙千里道。依倚九層臺。出處
寧知命。輪轅豈自媒。更慚張處士。相與別蒿萊。

衆甫送李觀之宣州謁袁中丞詩云。古渡大江濱。西南據要津。自當舟楫路。應濟往來人。翻浪驚飛鳥。迴
風起綠蘋。君看波上客。晚歲獨垂綸。

高仲武云。衆甫婉媚綺錯。巧用文字。工於興喻。只如不隨淮海變。空媿稻粱恩。盡陳謝之源。又自當舟楫
路。應濟往來人。得諷興之要。形容體裁。率皆如此。文流之佳士也。

衆甫字千初。清河人。年過耳順。方脫章甫。冠惠文。爲太常寺太祝。尉河南壽安縣。罷秩僑居雲陽。時以緣

情比興疏導心術志之所之輒詣絕境後拜監察御史爲淮寧軍從事建中三年卒

櫟載之誌其墓

田登

毛本云一作澄

成都爲客作詩云蜀郡將知遠城南萬里橋衣緣鄉淚溼貌以客愁銷地富魚爲米山芳桂是樵旅遊唯得酒今日過明朝

登大歷天寶間人杜子美贈獻納史起居田舍人詩卽登也末句云揚雄更有河東賦惟待吹噓送上天蓋登以舍人奉使入蜀肅宗時人也

柳郴

郴與李端盧綸友善有賊平後送客還鄉詩云他鄉生白髮舊國有青山最有思致尤長於短句如贈別云江浦程千里離樽淚數行無論吳與楚俱是客他鄉又云何處最悲辛長亭臨古津往來舟楫路前後有離人

郴大曆間進士

李彥遠

採桑云採桑畏日高不待春眠足攀條有餘愁那矜貌如玉千金豈不贈五馬空躑躅何以變貞性幽篁雪中綠

彥遠大曆貞元間詩人

薛綸

勅贈康尚書美人云。天門喜氣曉氛氲。聖主臨軒召冠軍。欲令從此行霖雨。先賜巫山一片雲。康尚書日知也。德宗時斬李惟岳。以功擢爲深趙節度。遷奉誠軍。陟晉絳。尋德宗時河東詩人也。

元載

王忠嗣鎮北京。以女韞秀歸元載。歲久而見輕。韞秀勸之遊學。元乃遊秦。爲詩別韞秀曰。年來誰不厭龍鍾。雖在侯門似不容。看取海山寒翠樹。苦遭霜霰到秦封。妻請偕行曰。路掃饑寒跡。天哀志氣人。休零別離淚。攜手入西秦。

元到京。屢陳時務。深符上旨。肅宗擢拜中書。王寄諸姊妹詩曰。相國已隨麟閣貴。家風第一右丞詩。笄年解笑鳴機婦。恥見蘇秦富貴時。元肅代兩朝宰相。貴盛無比。復爲一篇以喻之曰。楚竹燕歌動畫梁。春蘭重換舞衣裳。公孫開館招佳客。知道浮雲不久長。

元貪恠被誅。上令王氏入宮。歎曰。二十年太原節度使女。十六年宰相妻。誰能爲長信昭陽之事。死亦幸矣。京兆答斃。

大曆五年春。載早朝。有獻文章者。公令左右收之。其人若欲公讀。公云。候入中書當爲看。其人言若不能讀。自誦畢。因亦不見。詩曰。城東城西舊行處。城裏花飛亂如絮。海燕銜泥欲下來。屋裏無人欲飛去。載後破家。妻子被殺。其一云。城南路長無宿處。荻花紛紛如柳絮。海燕啣泥欲作巢。空室無人卻飛去。

張元宗

登景雲寺閣云。胡馬飲河洛。我家從此遷。今來獨垂淚。三十六峯前。
望終南山云。紅塵白日長安路。馬足車輪不暫閒。唯有茂陵多病客。每來高處望南山。

楊郇伯

妓人出家云。盡出花鈿與四隣。雲鬢翦落厭殘春。暫驚風燭難留世。便是蓮花不染身。貝葉欲翻迷錦字。

梵聲初學誤梁塵。從今豔色歸空後。湘浦應無解佩人。

寶常途中立春寄懷郇伯云。浪跡終年客。驚心此地春。風前獨去馬。澤畔耦耕人。老大交情重。悲涼物外親。子雲今在宅。應見柳條新。

高拯

拯及第後贈試官云。公子求賢未識真。欲將毛遂比常倫。當時不及三千客。今日何如十九人。
拯大曆十三年進士試官。薛邕也。

梁鎰

七夕汎舟云。雲端有靈匹。掩映拂妝臺。夜久應搖珮。天高響不來。片歡秋始展。殘夢曉翻催。卻怨填河鵲。留橋又不回。

詠木老人云。刻木牽絲作老翁。雞皮鶴髮與真同。須臾弄罷寂無事。還似人生一夢中。
古意云。妾家巫峽陽。羅幌寢銀牀。曉日臨窗久。春風引夢長。落釵仍在鬢。微汗欲消香。縱使蒙籠覺。魂猶逐楚王。

錢起秋夜與鎰文宴云。車到閒林下。林香蕙草時。好風能自至。明月不須期。秋水翻荷影。晴雲脆柳絲。微官是底物。許日廢言詩。

明皇雜錄云。李輔國矯制遷明皇西宮。高力士竄嶺表。帝戚戚不樂。日一蔬食。吟詩云。刻木牽絲作老翁。至一夢中。不知明皇作。或詠鎰詩也。

劉長川

寶劍篇云。寶劍不可得。相逢幾許難。今朝一度見。赤色照人寒。匣裏星文動。環邊月影殘。自然神鬼伏。無事莫空彈。

將赴東都上李相公云。四海兵初偃。平津閣正開。誰知大爐下。還有不然灰。

長川肅代時詩人也。

姚倫

感秋云。試向疎林望。方知節候殊。亂聲千葉下。寒影一巢孤。不蔽秋天鴈。驚飛夜月烏。霜風與春日。幾度遣榮枯。

倫過章秀才洛陽客舍云。達人心自適。旅舍當閒居。不出來時徑。猶看讀了書。晚山嵐色近。斜日樹陰疎。盡是忘言客。聽君誦子虛。

高仲武云。姚子詩雖未洪深。去凡已遠。屬興比事。不失文流。如亂聲千葉下。寒影一巢孤。亦篇章之秀也。

倫終揚州大都府曹參軍。

孫處立

詠黃鸞云。欲嘯聲猶澀。輕飛羽未調。高風不借便。何處得遷喬。
處立。江寧人。長安中爲左拾遺。善屬文。嘗恨天下無書。以廣新聞。神龍初。桓彥範等用事。處立遺書論時事得失。不用。乃去官還鄉。以病卒。

劉復

寺居清晨云。高枕對曉月。衣巾清且涼。露華朝未晞。滴瀝含虛光。隔竹聞汲井。開扉見焚香。幽心感衰病。結念依法王。青冥早雲飛。杳眇空鳥翔。此情皆有釋。悠悠知所忘。
經禁城云。日沒路且長。遊子欲涕零。荒城無人路。秋草飛寒螢。東南古丘墟。莽蒼馳郊坰。黃雲晦斷岸。枯井臨崩亭。昔人竟何之。窮泉獨冥冥。蒼苔沒碑版。朽骨無精靈。俛仰寄世間。忽如流波萍。金石非汝壽。浮生等臊腥。不如學神仙。服食求丹經。

遊仙云。稅駕倚扶桑。逍遙望九州。二老佐軒轅。移戈戮蚩尤。功成棄之去。乘龍上天遊。天上見玉皇。壽與天地休。俯視崑崙宮。五城十二樓。王母何窈眇。玉質清且柔。揚袂折瓊芳。寄我天東頭。相思千萬歲。大運浩悠悠。安用知吾道。日月不能周。寄音青鳥翼。謝爾碧海流。

送王倫詩云。春天日未曛。楚客酬送君。翩翩孤黃鶴。萬里滄洲雲。四方各有心。豈得常顧羣。山連巴湘遠。水與荆吳分。清光日阻修。尺素安可論。相思寄夢寐。瑤草空氛氲。

出三城別幕中三判官詩云。翔禽託高柯。倦客念主人。恩義有所委。四海同一身。況皆廣大姿。翰音見良

辰。陳規佐武略。高統據要津。常願投素誠。今果得所申。金壘列四座。廣廈無氛塵。留連徂暑中。親望歷數旬。河山險以固。士卒勇且仁。飾裝去未歸。相追越城闔。愧無青玉案。緘佩永不泯。復登大曆進士第。嘗爲水部外郎。爲石洪父平墓銘。

朱彬

丹陽作云。暫入新豐市。猶聞舊酒香。抱琴沽一醉。盡日臥垂楊。彬大曆貞元間詩人。

戴叔倫

字幼公。潤州人。師事蕭穎士。爲門人冠。劉晏管鹽鐵。表主管湖南。至雲安。楊惠琳反。馳客劫之。曰。歸我金幣。可緩死。叔倫曰。身可殺。財不可得。乃捨之。累遷至容管經略。德宗嘗賦中和節詩。遣使者寵賜。代還。卒。早行寄朱山人放云。山曉旅人去。天高秋氣悲。明河川上沒。芳草露中衰。此別又萬里。少年能幾時。心知剡溪路。聊且寄前期。

和汴州李相公勉人日喜春云。年來日日春光好。今日春光好更新。獨獻菜羹憐應節。徧傳金勝喜逢人。煙添柳色看猶淺。鳥踏梅花落已頻。東閣此時聞一曲。翻令和者不勝春。

吳明府自遠來留宿云。出門逢故友。衣服滿塵埃。歲月不可問。山川何處來。倚城容弊宅。散職寄靈臺。自此留君醉。相歡得幾迴。

除夜宿石頭驛云。旅館誰相問。寒燈獨可親。一年將盡夜。萬里未歸人。寥落悲前事。支離笑此身。愁顏與

衰鬢明日又逢春。

客舍與故人偶集云。天秋月又滿。城闕夜千重。還作江南會。翻疑夢裏逢。風枝驚暗鵲。露草覆寒蛩。羈旅長堪醉。相留畏曉鐘。

送友人東歸云。萬里楊柳色。出關逢故人。輕煙拂流水。落日照行塵。積夢江湖闊。憶家兄弟貧。徘徊灞亭上。不語自傷春。

姚合取爲
極玄集

送謝夷甫宰鄮縣云。君去方爲縣。干戈尙未銷。邑中殘老小。亂後少官僚。廨宇經山火。公田沒海潮。到時應變俗。新政滿餘姚。

高仲武云。叔倫爲人溫雅。善舉止。無賢不肖。見皆盡心。在租庸幕數年。夕惕靡怠。吏部尙書劉公與祠部員外張繼書云。博訪選材。揖對賓客。如戴叔倫。其見推稱如此。詩體雖不中越格。然廨宇經山火。公田沒海潮。亦指事造形之工者。其骨氣稍輕。故詩亦少。

于鵠

鵠野田行云。日沒出古城。野田何茫茫。寒狐上孤冢。獵火燒白楊。昔人未爲泉下客。若到此中還斷腸。題隣居云。僻巷隣家少。茅簷喜並居。蒸梨常共竈。澆薤亦同渠。傳屐朝尋藥。分燈夜讀書。雖然在城市。還得似樵魚。

寄盧儼員外秋衣詞云。寄遠惟以心。心誠亦難知。篋中有秋帛。裁成遠客衣。縫製雖女工。尺度手自持。容貌常目中。長短不復疑。針縫密且堅。遊客多塵縑。意欲都無言。澣濯耐歲時。殷勤託行人。傳語慎勿遺。別

來年已老。亦聞鬢成絲。縱然更相逢。握手唯是悲。所寄莫復棄。願見常相思。

買山吟云。買得幽山入漢陽。槿籬疎處種桃榔。唯有獼猴來往熟。弄人拋果滿書堂。

山中寄樊尚書云。卻憶東溪日。同袍是魯儒。儒房閒共宿。酒肆醉相扶。江上雙旌貴。山中病客孤。無媒還有計。春谷種桑榆。

鵠大曆貞元間詩人也。爲諸府從事。居江湖間。有卜居漢陽及荆南陪樊尚書賞花詩。其自述曰。三十無名客。空山獨臥秋。豈以詩窮者耶。

襄陽席上作云。老大看花猶未足。沿江遇得一枝紅。日斜人散東風急。吹向誰家明月中。毛本云。御覽集題作襄陽看花

時因小蠻作。自小看花情不足。江邊尋得數枝紅。黃昏人散春風起。吹落誰家明月中。

送死多於生。幾人得終老。句右張爲取作主客圖。

張籍傷鵠詩云。野性疎時俗。甫命一作再拜乃從軍。氣高終不合。去如鏡上塵。

鵠送客遊邊云。若到并州北。誰人不憶家。寒深無去伴。路盡有平沙。磧冷唯逢鴈。天春不見花。莫隨邊將意。垂老事輕車。

江南曲云。偶向江邊採白蘋。還隨女伴賽江神。衆中不敢分明語。暗擲金錢卜遠人。章莊取爲又玄集。毛本云。集無。

張籍贈王建云。于君去後交遊少。東野亡來篋笥貧。賴有白頭王建在。眼前猶是詠詩人。

王季文

季文字宗素。池陽人。少厭名利。居九華。遇異人授九仙飛化之術。曰。子當先決科於詞籍。後策名於真列。

冥注使然。不可移也。登咸通中進士第。授祕書郎。尋謝病歸九華。日一浴於山之龍潭。寒暑不渝。
季文九華山謠云。九華崢嶸占南陸。蓮花擢本山半腹。翠屏橫截萬里天。瀑水落深千丈玉。雲梯石磴入
杳冥。俯看四極如中庭。丹崖壓下廬霍勢。白日隱出牛斗星。杉松一歲抽數尺。瓊草貪緣秀層壁。南風拂
曉煙霧開。滿山葱蒨鋪鮮碧。雷霆往往從地發。龍臥豹藏安可別。峻極遙看旻昊蒼。挺生豈得無才傑。神
仙憚險莫敢登。馭風駕鶴循丘陵。陽鳥不見峯頂樹。大火尙結晶中冰。靈光爽氣曠復旭。晴天倒影西江
淥。具區彭蠡夾兩傍。正可別作一嶽當少陽。

唐詩紀事卷第三十

李益 附僧廣宣杜羔
諸葛覺章執中

耿漳

盧綸

韓翃

錢起

司空曙

苗發

崔嗣

李端

冷朝陽

李益

益姑臧人字君虞大曆四年登第其受降城聞笛詩教坊樂人取爲聲樂度曲又有寫征人歌早行詩爲圖畫者迴樂峯前沙似雪之詩是也益有心疾不見用及爲幽州劉濟營田副使獻詩有感恩知有地上望京樓之句左遷右庶子年且老門人趙宗儒自宰相罷免年七十餘益曰此吾爲東府所選進士也聞者憐益之困後遷禮部尙書致仕卒

益錄其從軍詩贈左補闕盧景亮自序云吾在兵間故爲文多軍旅之思或軍中酒酣塞上兵寢投劍秉筆散懷於斯文率皆出乎慷慨意氣武毅果厲本其涼國則世將之後乃西州之遺民歟亦其坎軻當世發憤之所致也其詩皆建中貞元間作

夜上受降城聞笛詩云迴樂峯前沙似雪受降城下月如霜不知何處吹蘆管一夜征人盡望鄉峯烽火征人歌云胡風凍合鵬鵠泉牧馬千羣逐暖川塞外征行無盡日年年移帳雪中天曉角詩云邊霜一夜落平蕪吹角當城片月孤無數塞鴻飛不度秋風卷入小單于

從軍北征云。天山雪後海風寒。橫笛偏吹行路難。磧裏征人三十萬。一時迴向月明看。

獻劉濟云。草綠古燕州。鶯聲引獨遊。鴈歸天北畔。春盡海西頭。向日花偏落。馳年水自流。感恩知有地。不上望京樓。

從軍有苦樂行

時從司空公北征作

云。勞者且莫歌。我欲歌送觴。行軍有苦樂。此曲樂未央。僕居在隴上。隴水斷

人腸。東過秦宮路。宮樹入咸陽。時逢漢帝出。諫獵至長楊。詎馳遊俠窟。非結少年場。一旦承嘉惠。輕身重

恩光。秉筆參帷帟。從軍至朔方。邊地多陰風。草木自淒涼。斷絕西海去。出沒胡沙長。參差引鴈翼。隱轉騰

軍裝。劍文夜如水。馬汗凍成霜。使氣五都少。矜功六郡良。山河起目前。睚眦死路傍。北馳逐獯虜。西臨復

舊疆。昔還賦餘資。今出乃贏糧。一矢致夏服。我弓不再張。寄言丈夫雄。苦樂身自當。

來從竇車騎云

自朔方行作

束髮逢世屯。懷恩抱明義。讀書良不武。學劍慙非智。遂別魯諸生。來從竇車騎。追

兵起邊急。絡馬黃金轡。出入燕南陲。由來重意氣。自經皋蘭戰。入破樓煩地。西北護三邊。東南留一尉。時

過如雲雨。參差不自意。將軍失恩澤。萬事從此異。置酒高臺上。薄暮秋風至。長戟與我歸。歸來同棄置。自

酌還自飲。非名又非利。歌出易水寒。琴下雍門淚。出逢平樂舊。言在天階侍。問我從軍苦。自陳少年貴。丈

夫交四海。徒論身自致。漢將不封侯。蘇卿還遠使。今我終此曲。此曲誠不易。貴人難識心。何由知忌諱。

夜發軍中云。邊馬櫪上驚。雄劍匣中鳴。半夜軍書至。匈奴寇六城。中堅分暗陣。太乙起神兵。出沒風雲合。

蒼皇豺虎爭。今日邊庭戰。緣賞不緣名。

五城道中云。金饒隨玉節。落日河邊路。沙鳴後騎來。鴈起前軍度。五城鳴斥堠。三秦新召募。天寒白登道。

寒濁陰山霧仍聞舊兵老。上在烏蘭戍。笳簫漢思繁。旌旗邊色故。寢興倦弓甲。勤役傷風露。來遠賞不行。鋒交勦乃茂。未知朔方道。何年罷兵賦。毛本云。集無。

塞下曲云。蕃門部落能結束。朝朝馳獵河南曲。一作朝馳暮獵。冀河曲。燕歌未斷塞鴻飛。牧馬羣嘶邊草綠。秦築長

城城已摧。漢武北上單于臺。古來征戰虜不盡。至今還復天兵來。黃河東流流九折。沙場埋恨何時絕。蔡

琰沒去造胡笳。蘇武歸來持漢節。爲報如今都護雄。匈奴且莫下雲中。請書塞北陰山石。願比燕然車騎

功。

大曆十才子。唐書不見人數。盧綸。錢起。郎士元。司空曙。李端。李益。苗發。皇甫曾。耿漳。李嘉祐。又云吉頊。夏

侯審。亦是。或云錢起。盧綸。司空曙。皇甫曾。李嘉祐。吉中孚。苗發。郎士元。李益。耿漳。李端。二李皆出於姑臧。

庶子爲文章。李益。尙書爲門戶。李益。一日赴嘉會。尙書曰。今日兩箇坐頭。皆是李益。

紅樓下聯句云。佛剎接重城。紅樓切太清。紫雲連照灼。丹檻望崢嶸。廣宣。樓棟煙虹入。軒窗日月平。參差五

陵晚。分背八川明。李益。絃韻風初過。蓮枝浪欲傾。敬瞻疑涌見。圍繞學無生。杜羔。

蘭陵僻居聯句云。潘岳閑居賦。陶潛獨酌謠。二賢成往事。三徑是今朝。廣宣。生幸逢唐運。昌時奉帝堯。進能

諸啓沃。退卽混漁樵。李益。蠹簡封延閣。彫欄闕上霄。相從清曠地。秋露挹蘭苕。杜羔。

天津橋南山各題一句云。野坐分苔石。李益。山行遶菊叢。韋執中。雲衣惹不破。諸葛。秋色望來空。

閒庭草色能留馬。當路楊花不避人。句。笳簫漢思繁。旌旗邊色故。句。馬汗凍成霜。句。右張爲取作主客圖。

以益爲清奇雅正主。